

摘藻堂四庫全書薈要

集部

欽定四庫全書卷會要

集部

樂城集

卷二

詳校官助教臣常循

欽定四庫全書薈要

藥城集

提要

臣

等謹案藥城集五十卷藥城後集二十四

卷藥城第三集十卷應詔集十二卷宋蘇轍
撰轍所作詩傳春秋傳古史老子解諸書已
著錄經史子三部中晁公武讀書志陳振孫
書錄解題載藥城諸集卷目並與今本相同

惟宋史藝文志稱樂城集八十四卷應詔集

十卷策論十卷均陽雜著一卷焦竑國史經

籍志則又于樂城集外別出黃門集七十卷

均與晁陳二家所紀不合今按八十四卷正

合三集總數宋志蓋統舉言之策論當即應

詔集而誤以十二卷為十卷惟均陽雜著未

見其書至竑所載黃門集疑即樂城集乃後

人以官目之竑不知而複出也其正集乃轍

為尚書左丞時所輯元祐以前之作後集乃
自元祐九年至崇寧四年所作三集乃自崇
寧五年至政和元年所作應詔集則所進策
論及應試諸作轍之孫籀撰樂城遺言于平
日論文大旨叙錄甚詳而亦頗及其篇目如
紀辨才碑則具云見樂城後集而於馬知節
文集跋生日漁家傲詞諸篇之不在集中者
並為全錄其文以示拾遺補闕之意然集為

輒所手定棄取自有深意與東坡諸集出自
他人裒輯者不同故自宋以來原本相傳從
未有敢以意為附益者特近時重刊甚稀此
為明代舊刊尚少訛闕案陸游老學庵筆記
稱輒在績溪贈同官詩有歸報仇梅省文字
麥苗含穠欲蠶眠句乃用唐耿緯語而譏均
州刻本輒改作仇香之非今此本仍作仇梅
則所據猶宋時善本也乾隆四十三年二月

恭校上

總纂官

臣紀昀

臣

陸

錫

熊

臣

孫

士

毅

總校

官

臣

陸

費

墀

欽定四庫全書薈要卷一萬四千九百九十六

集部

樂城集卷一

宋 蘇轍 撰

詩五十二首

郭綸

綸本河西弓箭手屢戰有功不賞自黎州都監官滿貧不能歸權嘉州監稅



郭綸本蕃種騎關雄西戎流落初無罪因循遂龍鍾嘉

州已經歲見我涕無窮自言將家子少小學彎弓長遇
西鄙亂走馬救邊烽手挑丈八矛所往如投空平生事
苦戰數與大寇逢昔在定川寨賊來如羣蜂萬騎擁酋

帥自謂白相公揮兵取其元模糊腥血紅戰勝士氣振
赴敵如旋風蚩蚩羣裘將不信勇且忠遙語相勸誘一
矢摧厥胸短兵接死地日落沙塵蒙馳歸不敢息馬口
銜折鋒誰知八尺軀脫命萬死中忽聞南蠻叛羽檄行
忽忽將兵赴危難瘴霧不辭衝行經賀州城寂寞無人
蹤攀堞莽不見入據為築壙一旦賊兵下百計燒且攻
三日不能陷救至遂得通崎嶇有成績元帥多異同有
功不見賞憔悴落巴賔已矣誰復信言之氣恟恟予不

識郭綸聞此為斂容一夫何足言竊恐悲羣雄此非介
子推安肯不計功郭綸未嘗敗用之可前鋒

初發嘉州

放舟沫江濱往意念荆楚擊鼓樹兩旗勢如遠征戍紛
紛上船人槳急不容語余生雖江陽未省至嘉樹巉巖
九頂峯可愛不可住飛舟過山足佛脚見江潯舟人盡
斂容競欲揖其拇俄頃已不見烏牛在中渚移舟近山
陰壁峭上無路云有古郭生璞此地苦箋注區區辨蟲

魚爾雅細分縷洗硯去殘墨遍水如黑霧至今江上魚
頂有遺墨處覽物悲古人嗟此空自苦余今方南行朝
夕事鳴榔至楚不復留上馬千里去誰能居深山永與
禽獸伍此事誰是非行行重回顧

過宜賓見夷中亂山

江流日益深民語漸已變岸濶山盡平連峯遠非漢慘
慘瘴氣青薄薄寒日暖峯巒若崖石草木條幹短遙想
彼居人狀類麕鹿窺何時遂平定戍卒從此返

夜泊牛口

行過石壁盡夜泊牛口渚野老三
四家寒燈照疎樹見我各無言
倚石但箕踞水寒雙脰長壞袴
不蔽股日暮江上歸潛魚遠難
捕稻飯不滿盂饑卧冷徹曙安
知城市歡守此田野趣祇應長
凍饑寒暑不能苦

戎州

江水通三峽州城控百蠻沙昏
行旅倦邊靜禁軍閑漢虜更成
市羅紈靳不還投壘揀精密換
馬瘦孱顏兀兀

頭垂髻團團耳帶環夷聲不可會爭利苦間關

舟中聽琴

江流浩浩羣動息琴聲琅琅中夜鳴水深天濶音響遠
仰視斗牛皆從橫昔有至人愛奇曲學之三歲終無成
一朝隨師過滄海留置絕島不復迎終年見怪心自感
海水震掉魚龍驚翻回蕩湍有遺韻琴意忽忽從此生
師來迎笑問所得撫手無言心已明世人囂囂好絲竹
撞鐘擊鼓浪謂榮安知江琴韻超絕擺耳大笑不肯聽

泊南井口期任遵聖

期君荒江漬未至望已極朔風吹烏裘隱隱沙上立愧
余後期至先到犯寒色既泊問所如歸去已無及繫舟
重相邀雨冷塗路濕

江上早起

晨興孤舟上盥濯夜氣清整巾未皇坐雙櫓輒已鳴日
出江霧散江上山從橫區區茅舍翁曉出露氣腥收筒
得大鯉愛惜不忍烹持之易斗粟朝飫厭魚羹蕭蕭遠

風起泛泛野鴈驚忽過百餘里山水互變更逢舟間所
如彼此不知名赳赳江湖間殊勝地上行旦游市井喧
莫宿無人聲江上誠足樂無怪陶朱生

江上看山

朝看江上枯崖山憔悴荒榛赤如赭莫行百里一回頭
落日孤雲靄新畫前山更遠色更深誰知可愛信如今
唯有巫山最穠秀依然不負遠來心

山胡

山胡擁蒼毳兩耳白茸茸野樹啼終日黔山深幾重啄
溪探細石噪虎上孤峯被執應多恨筠籠僅不容

白鷗

白鷗形似鴿搖曳尾能長寂寞懷溪水低回愛稻梁田
家比鷄鶩野食薦杯觴肯信朱門裏徘徊占玉塘

屈原塔

在忠州

屈原遺宅秭歸山南賓古者巴子國山中遺塔知幾年
過者遲疑不能識浮圖高絕誰所為原苑豈復待汝力

臨江慷慨心自明南訪重華訟孤直世人不知徒悲傷
強爲築土高岌岌

嚴顏碑

亦在忠州

古碑殘缺不可讀遠人愛惜未忍磨相傳昔者嚴太守
刻石千歲字已訛嚴顏平生吾不記獨憶城破節最高
被擒不辱古亦有吾愛善折張飛豪軍中生死何足怪
乘勝使氣可若何斫頭徐死子無怒我豈畏死如兒曹
匹夫受戮或不避所重壯氣吞黃河臨危閒暇有如此

覽碑慷慨思橫戈

竹枝歌

忠州作

舟行千里不至楚忽聞竹枝皆楚語楚言啁哳安可分
江中明月多風露扁舟日落駐平沙茅屋竹籬三四家
連春並汲各無語齊唱竹枝如有嗟可憐楚人足悲訴
歲樂年豐爾何苦釣魚長江江水深耕田種麥畏狼虎
俚人風俗非中原處子不嫁如等閒雙鬟垂頂髮已白
負水採薪長苦艱上山採薪多荆棘負水入溪波浪黑

天寒斫木手如龜水重還家足無力山深瘴暖霜露乾
夜長無衣猶苦寒平生有似麋與鹿一旦白髮已百年
江上乘舟何處客列肆喧譁占平磧遠來忽去不記州
罷市歸船不相識去家千里未能歸忽聽長歌皆慘悽
空船獨宿無與語月滿長江歸路迷路迷鄉思渺何極
長怨歌聲苦淒急不知歌者樂與悲遠客乍聞皆掩泣

望夫臺

在忠州南
數十里

江上孤峯石為骨望夫不來空獨立去時江水拍山流

去後江移水成磧江移岸改安可知獨與高山化為石
山高身在心不移慰爾行人遠行役

八陣磧

在夔州

漲江吹八陣江落陣如故我來苦寒後平沙如匹素乘
高望遺迹磊磊六十四遙指如布棊就視不知處世稱
諸葛公用衆有法度區區落褒斜軍旅無濶步中原竟
不到置陣狹無所茫茫平沙中積石排隊伍獨使後世
人知我非莽鹵柰何長蛇形千古竟不悟惟餘桓元子

久視不能去

灩澦堆

或云上
有古碑

江中石屏灩澦堆鼉靈夏禹不能摧
深根百丈無敢近
落日紛紛鳬鴈來
何人磊落不畏死
為我赤脚登崔嵬
上有古碑刻奇篆
當使盡讀磨蒼苔
此碑若見必有怪
恐至絕頂遭風雷

入峽

舟行瞿唐口兩耳風鳴號渺然長江水
千里投一瓢峽

門石為戶鬱怒水力驕扁舟落中流浩如一葉飄呼吸
信奔浪不復由長篙捩舵破瀆旋畏與亂石遭兩山蹙
相值望之不容舳漸近乃可入白鹽最雄高草木皆倒
生哀叫悲玄猿白雲繚長袖零露如飛毛緬懷洛水年
慘蹙病有堯禹益決岷水屢與山鬼鏖摧岡轉大石破
地䟽洪濤巉巉當道山斬截肩尾銷峭壁下無趾連峯
斷脩腰破處不生草上不挂鳥巢水怪不盡戮下有龍
與鼉遼哉千萬年禹苑遺迹牢豈必見河洛開峽斯已

勞

巫山廟

山中廟堂古神女楚巫婆娑奏歌舞空山日落悲風吹
舉手睢盱道神語神仙潔清非世人瓦盎傾醪薦麋脯
予知神君竟何自西方真人古王母飄然乘風遊九州
竭渡西海薄中土白雲為車駕蒼虬驂乘湘君宓妃御
天孫織綃素非素衣裳飄飄薄烟霧泊然冲虛眇無營
朝食屑玉噉瓊乳下視人世安可據超江乘山去無所

巫山之下江流清偶然愛之不能去湍崖激作相喧聒
白花翻翻龍正怒堯使大禹導九州石隕山隊幾折股
山前恐懼久無措稽首山下苦求助丹書玉笈世莫窺
指示文字相爾汝擘山洩江幸無苦庚辰虞余實相禹
功成事定世莫知空山俄頃千萬古廟中擊鼓吹長簫
採蘭為飧蕙為肴玉缶薦芰香飄蕭龍勺取酒注白茅
神來享之風飄飄荒山長江何所有豈有瓊玉薦沕寥
神君聰明無我責為我驅獸攘龍蛟乘船入楚沂巴蜀

瀆旋深惡秋水高歸來無恙無以報山上麥熟可作醪
神君尊貴豈待我再拜長跪神所勞

巫山廟烏

巫廟真人古列仙高心獨愛玉爐烟饑烏巧會行人意
來去紛紛噪客船

昭君村

峽女王嬙繼屈須入宮曾不愧秦姝一朝遠逐呼韓去
遙憶江頭捕鯉魚江上大魚安散釣轉拖橫江筋力小

深邊積雪厚埋牛兩處辛勤何處好去家離俗慕榮華
富貴終身獨可嗟不及故鄉山上女夜從東舍嫁西家

三遊洞

洞前危逕不容足洞中明曠坐百人蒼崖碑兀起成柱
亂石散列如驚麋清溪百丈下無路水滿沙土如魚鱗
夜深明月出山頂下照洞口纔及唇沉沉深黑若大屋
野老篝火青如燐平明欲出迷上下洞氣飄亂為橫雲
深山大澤亦有是野鳥鳴噪孤熊蹲三人一去無復見

至今冠蓋長滿門

寄題清溪寺

在硤州鬼谷子故居

清溪鬼谷子雄辯傾六國視世無足言自閉長默默蘇
張何為者欲竊長短術學成果無賴遂為世所惑顛倒
賣諸侯傾轉莫可執後世何不明疑我不汝及誰知居
深山玩世可終日君觀二弟子死處竟莫得客齊自披
裂投魏求寄食悠悠清溪中石亂流水急溪魚為朝食
老死得安穴居亂獨無言其辯吾不測

息壤

在荆南
南門外

江上寒沙薄如席一夕墳起成高丘江流傾轉力不勝
左齧右吐非自由南郡城南獨何者平地生長殊不休
當中屋脊不盈尺深入百丈皆石樓古人不知下有怪
發破不掩水漲浮傳言夏鯀塞澤水上帝愛此無敢偷
竊持大畚負長鑄刺取不已帝使流禹知水怒非塞止
網捕百怪雜蜃鮫掘壕入土不計丈投擲填壓聲鳴啾
一時既定憂後世恐此竊出壞九州神人已死無復制

故以此土封其頭發之輒滿不可既意使靈物長幽囚
前年大旱千里赤取土盈掬雨不收誰言咫尺舊黃壤
中有千歲龍與虬高山萬仞猶可削嗟此何獨生如疣
天長地遠莽無極雖有缺壞誰能賙我疑天意固有在
患世多事窮鑄鋳埏陶鼓濤地力困久不自補無為憂
世無女媧空白石磊磊滿地如浮漚耕田鑿井自無已
息壤無幾安能酬

荆門惠泉

泉源何從來山下長溪發油然本無營誰使自激冽
茫九地底大水浮一葉使水皆為泉地已不勝洩應是
泉水中獨不容至潔涓涓自傾瀉奕奕見清澈石泓淨
無塵中有三尺雪下為百丈溪冷不受魚鼈脫衣浣中
流解我雙足熱樂哉泉上翁大旱不知渴

答荆門張都官維見和惠泉

荒涼荆門西泉水誰為洩發源雖甚微來意不可折
平鋪清地滿皎皎自明澈甘涼最宜茶羊炙可用雪炎風

五月交中夜吐明月太守燕已遠青嶂空嶮嶮泉上白
髮翁來飲杯饌闕酌水自獻酬箕踞無禮節區區游泉
人常值午日烈回首憂重城賞玩安能徹

剡陽早發

春氣入楚澤原上草猶枯北風吹栗林梅蘂颯已無我
行亦何事驅馬無疾徐楚人信稀少田畝任蓁蕪空有
道路人擾擾不留車悲傷彼何懶歎息此亦愚今我何
為爾豈亦愚者徒行行楚山曉霜露滿陂湖

襄陽古樂府二首

野鷹來

野鷹來雄雉走蒼茫
荒榛下毳毼大如斗
鷹來蕭蕭風雨寒
壯士臺中一揮肘
臺高百尺臨平川
山中放火秋草乾
雉肥兔飽走不去
野鷹飛下風蕭然
嗟我呼鷹臺人去
臺已圯高臺不可見
況復呼鷹子長歌
野鷹來當年落誰耳
父生已不武子立又不強
北兵果南下擾擾如驅羊
鷹來野雉何暇走
束縛籠中安得翔
可憐野雉

亦有爪雨手捽鷹猶可傷

襄陽樂

誰言襄陽苦歌者樂襄陽太守劉公子千年未可忘劉
公一去歲時改惟有州南漢水長漢水南流峴山碧種
稻耕田泥没尺里人種麥滿高原長使越人耕大澤澤
中多水原上乾越人為種楚人食火耕水耨古常然漢
水魚多去滿船長有行人知此樂來買槎頭縮項鰻

雙鳬觀

在葉縣

王喬西飛朝洛陽飄飄千里雙鳬翔鳬飛遭網不能去
惟有空屨鳬已亡誰知野鳥不能化豈必雙屨能飛揚
鳬神屨怪當有在搔首野廟春風長

懷黽池寄子瞻兄

相携話別鄭原上其道長途怕雪泥歸騎還尋大梁陌
行人已渡古嶠西曾為縣吏民知否轍嘗為此縣簿未赴而中第舊

宿僧房壁共題轍昔與子瞻應舉過宿縣中寺舍題其老僧奉閑之壁遙想獨遊

佳味少無言騅馬但鳴嘶

辛丑除日寄子瞻

一歲不復居一日安足惜人心畏增年對酒語終夕夜
長書室幽燈燭明照席盤殮雜梁楚羊炙錯魚腊庖人
饌雞兔家味宛如昔有懷岐山下展轉不能釋念同去
閭里此節三已失初來寄荆渚魚鴈賤宜客楚人重歲
時爆竹鳴磔磔新春始涉五田凍未生麥相攜歷唐許
花柳漸牙拆居梁不耐貧投杞避糠覈城南庠齋靜終
歲守墳籍酒酸未嘗飲牛美每共炙謂言從明年此會

可懸射同為洛中吏相去不盈尺濁醪幸分季新筍可
餉伯嶢嶢嵩山美漾漾洛水碧官閒得相從春野玩朝
日安知書閣下羣子並遭馘偶成一朝榮遂使十里隔
何年相會歡逢節勿輕擲

次韻子瞻減降諸縣囚徒事畢登覽

山川足清曠闌闔巧拘囚安得殲阿御固為穆滿遊遙
知因渙汗遠出散幽憂原隰繁分繡村墟盡小侯春深
秦樹綠野濶渭河流四顧神蕭瑟前探意漲浮勝觀殊

未已往足詎能收下坂如浮舸登崖劇上樓强行腰偃
僂困坐氣噓咻鳥語林巒靜花明澗谷幽濯溪驚野老
伐路駭他州中散探深去文淵到處留聽琴峰下寺弄
石水中洲溪冷泉冰脚山高霧遶頭石潭清照骨瀑水
濺成鈎仙廟鳴鐘磬神官秉鉞劉養生聞帝女服氣絕
彭讎故宅猶傳尹先師不喜丘居人那識道過客漫停
騶巖谷誠深絕神仙信有不雲居無几杖霞珮棄鐫鏤
豹隱連山霧龍潛百尺湫門開誰與叩桃熟浪傳偷紺

髮清無比方瞳凜不侔會須林下見乞取壽年修
拔去和雞犬相隨若旆旒乘風遺騷擾長嘯賤笙篴從騎衣
皆羽前驅鬣盡蚪安能牽兩足暫得快雙眸自昔辭鄉
樹南行上楚舟萬江窮地脉三峽東天溝雲暗鄆都晚
波吹木樨秋尋溪緣窈窕入洞聽颼颼空寺收黃粟荒
祠畫伏彪登臨雖永日行邁肯停輶蓄縮今何事攀躋
昔已悠魏京饒士女春服聚蜉蝣雷動車爭陌花搖樹
繫鞦遊人紛蕩漾野鳥自嚶呦平日曾經洛閒居願卜

緤空言真比夢久渴漸成愁早退嘗相約辭窮痛自搜
愛山心劫劫從宦興油油海宇都無礙山林盡可投願
為雲上鵠莫作盎中鯁適性行隨足謀生富給喉今遊
雖不與後會豈無由畫出同更寢宵眠共覆裘弟兄真
欲爾朋好定誰儔試寫長篇調何人肯見酬

次韻子瞻太白山下早行題崇壽院

山下晨光晚林梢露滴昇峰頭斜見月野市早明燈樹
暗猶藏鵲堂開已饌僧據鞍應夢我聯騎昔嘗曾

次韻子瞻延生觀後山上小堂

謝公遊意未能厭，踏盡登山屐齒尖。
古殿神仙深杳杳，香爐烟翠起纖纖。
巖花寂歷飄瓊片，庭檜蕭疎漏玉蟾。
帝子莫歸人不見，微風細雨自開簾。

唐玉貞公主
修道於此山

次韻子瞻題仙遊潭中興寺

潭邊沙水不成泥，潭上孤禽挂嶮啼。
繚繞飛橋能試客，蒙茸翠蔓巧藏溪。
雲為絳帳馬融室，石作屏風玉女閨。
仙果知君今未足，臨潭脚戰怕長梯。

石鼻城

千山欲盡垂為鼻百戰皆空但有城虎闖穴中秦地恐
龍飛渭上漢江傾雍人未有章邯怨魏將猶存仲達情
睥睨陵遲春草滿白羊無數向風鳴

磻溪石

呂公年已莫擇主渭河邊跪餌留雙膝臨溪不計年神
專能陷石心大豈營鱸不到磻溪上安知自守堅

郿塢

董公平昔甚縱橫
晚歲藏金欲避兵
當日英雄智相似
燕南趙北亦為京

樓觀

老聃厭世入流沙
飄蕩如雲不可遮
弟子憐師將去國

關門望氣載還家
高臺尚有傳經處
畫壁空留駕犢車

一授遺書無復老
不知何苦服胡麻

此觀尹喜舊宅神仙傳言尹喜於流

沙之西服
巨勝實

次韻子瞻秋雪見寄二首

秋氣蕭騷仍見雪客愁繚繞動縈心幽吟北戶窓聲細
歸夢函關馬跡深疎樹飛花輕蕪蕪衰荷留柄亂簪簪
遙聞詩酒皆推勝社客何人近納睵

平時出處常聯袂文翰叨陪舊服膺自信老兄憐弱弟
豈關天下少良朋何時杯酒看浮白清夜看蔬粗滿登
離思隔年詩不盡秦梁雖遠速須應

次韻子瞻聞不赴商幕三首

怪我辭官免入商才疎深畏忝周行學從社稷非源本

近讀詩書識短長東舍久居如舊宅春蔬新種似吾鄉
閉門已學龜頭縮避謗仍兼雉尾藏

雉藏不能盡尾
鄉人以爲諺

南商西洛曾虛署長吏居民怪不來妄語自知當見棄
遠人未信本非才厭從貧李嘲東閣懶學諛張緩兩腮
知有四翁遺跡在山中豈信少人哉

塤動簾鳴只自知憂輕責少幸官卑聲名謾作耳中瑱
科第空收額底髭西鄙猖狂猶將將中朝閒暇自師師
近成新論無人語仰羨飛鴻兩翅差

次韻子瞻病中大雪

吾兄筆鋒雄詩俊不可和雪中思清絕韻惡愈難柰殷
勤賦黃竹自勸飲白墮言隨飛花落意與長風簸餘力
遠見撩千里寄璀璨嗟予學久廢有類轉空磨研磨久
無得安可待充貨空記乘峽船行意被摧剝溟濛覆洲
渚冷冽光照坐我唱君實酬馳騁不遑卧譬如逐獸盧
豈覺山徑坳酒肴助喧熱筆硯盡霑凝詩詞禁推類令
肅安敢破亦有同行入牽挽赴程課爾來隔秦魏渴望

等饑餓徒然遇佳雪有酒誰與賀

次韻子瞻記歲莫鄉俗三首

餽歲

周公制鄉禮無有相通佐鼎肉送子思烝豚出陽貨交
親隨高低豈問小與大自從此禮衰伏臘有饑卧鄉人
慕古俗酬酢等四坐東隣遺西舍迭出如蟻磨寧我不
飲食無爾相咎過相從慶新春顏色買愉和

別歲

富貴日月速貧賤覺歲遲遲速不須問俱作不可追親
舊且酣飲送爾天地涯歲歲雖無情從我歷四時酌爾
一杯酒留我壯且肥長作今歲歡勿起異日悲掉頭不
肯顧曾莫與我辭酒闌氣方橫豈信從爾衰

守歲

於菟絕繩去顧兔追龍蛇

是歲壬寅

奔走十二蟲羅網不及

遮嗟我地上人豈復柰爾何未去不自閒將去乃諠譁
天上驅獸官為君肯停檣魯陽揮長戈日車果再斜釃

酒勸爾醉期爾暫蹉跎偕醉遣爾去壽考自足誇

記歲首鄉俗寄子瞻二首

踏青

江上冰消岸草青三三五五踏青行浮橋沒水不勝重
野店壓糟無復清松下寒花初破萼谷中幽鳥漸嚶鳴
洞門泉脉龍睛動觀裏丹池鴨舌生山下鉶罌霑稚孺
峰頭鼓樂聚簪纓縞裙紅袂臨江影青蓋驂騑踏石聲
曉去爭先心蕩漾暮歸誇後醉縱橫最憐人散西軒靜

暖暖斜陽著樹明

蠶市

枯桑舒牙葉漸青
新蠶可浴日清明
前年器用隨手敗
今冬衣著及春營
傾困計口賣餘粟
買箔還家待種生
不惟箱篚供婦女
亦有鉏耨資男耕
空巷無人闔容治
六親相見爭邀迎
酒肴勸屬坊市滿
鼓笛繁亂倡優獰
蠶叢在時已如此
古人雖沒誰敢更
異方不見古風俗
但向陌上聞吹笙

子瞻寄示岐陽十五碑

堂上岐陽碑吾兄所與我吾兄自善書所取無不可歐
陽弱而立商隱瘦且橢小篆妙詰曲波字美婀娜譚藩
居顏前何類學顏頗魏華自磨淬峻秀不包裹九成刻
賢俊磊落雜么麼英公與褒鄂戈戟聞自荷何年學操
筆終歲惟箭筈書成亦可愛藝業嗟獨夥余雖謬學文
書字每慵墮車前駕騏驥車後繫羸跛逾年學舉足漸
亦行駛馾古人有遺迹筭短不及鏤願從兄發之洗硯

處兄左

樂城集卷一

欽定四庫全書薈要卷一萬四千九百九十七

集部

樂城集卷二

宋 蘇轍 撰

詩六十九首

畫文殊普賢

誰人畫此二菩薩
趺坐花心乘象駿
弟子先後執盂缶
老僧槎牙森比肩
山林脩道幾世劫
顏貌偉麗如開蓮
重崖宛轉帶林樹
野水荒蕩浮雲天
峨眉高處不可上
下有絕澗錮九泉
朝陽未出白霧起
有光升天如月圓

靈仙居中粗可識有類白兔依清蹕遊人禮拜千萬萬
迤邐漸遠如飛煙五臺不到想亦爾今之畫圖誰所傳
吾兄子瞻苦好異敗繒破紙收明鮮自從西行止得此
試與記錄代一觀

聞子瞻重遊南山

終南重到已春回山木緣崖綠似苔谷鳥鳴呼嘲獨往
野人笑語記曾來定邀道士彈鳴鹿誰與溪堂共酒杯
應有新詩還寄我與君和取當遊陪

彈鳴鹿飲溪堂皆
前遊終南時事

子瞻見許驪山澄泥硯

長安新硯石同堅不待書求遂許頒
豈必魏人勝近世
強推銅雀沒驪山
寒煤舒卷開雲葉
清露霑流發涕潛
早與封題寄書案
報君湘竹筆身班

寒食前一日寄子瞻

寒食明朝一百五
誰家冉冉尚厨煙
桃花開盡葉初綠
燕子飛來體自便
愛客漸能陪痛飲
讀書無思懶開編
秦川雪盡南山出
思共肩輿看麥田

大人久廢彈琴比借人雷琴以記舊曲十得三四
率爾拜呈

久厭凡桐不復彈偶然尋繹尚能存倉庚鳴樹思前歲
春水生波滿舊痕泉落空巖虛谷應珮敲清殿百官寒
終宵竊聽不能學庭樹無風月滿軒

聞子瞻習射

舊讀兵書氣已振近傳能射喜征鼙手隨樂節寧論中
箭作鷓鴣聲不害文力薄僅能勝五斗才高應自敵三軍

良家六郡傳真法馬上今誰最出羣

種菜

久種春蔬早不生園中汲水亂餅甕菘葵經火未出土
僮僕何朝飽食羹強有人功趨節令悵無甘雨困耘耕
家居閒暇厭長日欲看年華上菜莖

次韻子瞻題薛周逸老亭

飛鳥不知穴山鹿不知流薛子善飲酒口如汲水虬吾
觀腸胃間何異族黨州人滿地已盡一介不可留謂子

試飲水一酌不再求謂子飲醇酒百醕豈待酬酒可水
不可其說亦已悠以我視夫子胸腹百丈幽譬如田中
人視彼公與侯未省破顏飲何況裸露頭鵠夷謂大瓠
皆飽安用浮多少苟自適豈害為朋遊

次韻子瞻題長安王氏中隱堂五首

秦中勝岷蜀故國不須歸甲第春風滿巴山晝夢非竹
深啼鳥亂花落晚蜂飛我欲西還去敲門慎勿違

其二

唐朝卿相宅此外更應無請看庭前樹曾攀屋裏姝流
傳漸失實遺老不禁徂試問歸登物林間翠石孤或云此即宅歸登

其三

愛君高堂上有似蜀江墉墻外終南近簷西太白偏晚
梅晴自媚老竹暗相遷未到遙聞說吾廬安得然

其四

官去空留鶴山浮不見鰲竹林迎日淨槐木擁亭高烏

噪知人至蟬鳴覺口勞誰能飲堂上解帶不穿袍

其五

君看原上墓墳盡但餘碑誰見生前貴塵生帶下龜高
堂幸有酒一飲豈論貧勉強行樂耳古人良可悲

和子瞻鳳翔八觀八首

石鼓

岐山之陽石為鼓叩之不鳴懸無虞以為無用百無直
以為有用萬物祖置身無用有用間自託周宣誰敢侮

宣王沒後墳壠平秦野蒼茫不知處周人舊物惟存山
文武遺民盡囚虜鼎鍾無在鑄戈戟宮殿已倒生禾黍
厲宣子孫竄四方昭穆錯亂不存譜時有過客悲先王
綢繆牖戶徹桑土思宣不見幸鼓存由鼓求宣近為愈
彼皆有用世所好天地能生不能主君看項籍猛如狼
身死未冷割為脯馬童楊喜豈不仁待汝封侯非怨汝
何況外物固已輕毛擒翡翠尾執麈惟有蒼石於此時
獨以無用不見數形骸偃蹇任苔蘚文字皴剥困風雨

遭亂既以無用全有用還為太平取古人不見見遺物

如見方召與申甫文非科斗可窮詰簡編不載無訓詁

字形漫汗隨石缺蒼蛇生角龍折股亦如老人遭暴橫

頤下髭禿口齒齧形雖不具意可知有云楊柳貫魴鱖

魴鱖豈厭居溪谷自投網罟入居俎柳條柔弱長百尺

挽之不斷細如縷以柳貫魚魚不傷貫不傷魚魚樂苑

登之廟中鬼神格錫汝豐年多黍稷宣王用兵征四國

北摧犬戎南服楚將帥用命士卒驩苑生不顧闕虢虎

問之何術能使然撫之如子敬如父弱柳貫魚魚弗違
仁人在上民不怒請看石鼓非徒然長笑太山刻秦語

咀楚丈

咀當作詛

詛楚楚如桀詛秦秦則紂桀罪使信然紂語安足受牲
肥酒醪潔夸誕鬼不祐鬼非東諸侯豈信辯士口碑埋
祈年下意繞章華走得楚不付孫但為劉季取吾聞秦
穆公與晉實甥舅盟鄭絕晉歡結楚將自救事見呂相絕秦使
秦詛楚人晉亦議其後諸侯迭相詛禍福果誰有世人

不知道好古無可否何當投涇流渾濁蓋鄙醜

王維吳道子畫

在普門及開元寺

吾觀天地間萬事同一理扁也工斲輪乃知讀文字我
非畫中師偶亦識畫旨勇怯不必同要以各善耳壯馬
脫銜放平陸步驟風雨百夫靡美人婉婉守閑獨不出
庭戶修容止女能嫣然笑傾國馬能一蹶致千里優柔
自好勇自強各自勝絕無彼此誰言王摩詰乃過吳道
子試謂道子來置女所挾從軟美道子掉頭不肯應剛

傑我已足自恃雄奔不失馳精妙實無比老僧寂滅生
慮微侍女間絜非復婢丁寧勿相違幸使二子齒二子
遺跡今豈多岐陽可貴能獨備但使古壁常堅完塵土
雖積光豔長不毀

楊惠之塑維摩像

金粟如來瘦如腊坐上文殊秋月圓法門論極兩相可
言語不復相通傳至人養心遺四體瘦不為病肥非妍
誰人好道塑遺像鮐皮束骨筋扶咽兀然隱几心已滅

形如病鶴竦兩肩骨節支離體踈緩兩目視物猶惘然
長嗟靈運不知道強剪美須挿兩顴彼人視身若枯木
割去右臂非所患何況塑畫已身外豈必奪爾庸自全
真人遺意世莫識時有遊僧施鉢錢

東湖

不到東湖上但聞東湖吟詩詞已清絕佳境亦可尋
蜿蜒蒼石蝟蟠拏據湖心倒腹吐流水奔注為重深清風
蕩微波渺渺平無音有鼉行在沙有魚躍在潄鼉圓如

新荷魚細如蠹蟬梧桐生兩涯蕭蕭自成林孫枝復生
孫已中瑟與琴秋蟲噪蜩蜚春鳥鳴鳩鵲有客來無時
濯足蔭清陰自忘府中官取酒石上斟醉倒臥石上野
蟲上其襟醒來不知莫湖月翻黃金油然上馬去縱意
不自箴作詩招路人行樂宜及今人生不滿百一瞬何
所任路人掉頭笑去馬何駸駸子有不肖弟有冠未嘗
簪願身化爲線使子爲之鍼子欲烹鯉魚爲子漑釜鬻
子欲枕山石爲子求布衾異鄉雖云樂不如反故岑瘦

田可鑿耕桑柘可織紵東有軒轅泉隱隱如牛涔西有
管輅宅尚存青石碣彭女留膝踝禮拜意已欽慈母抱
衆子亂石寒蕭森朝往暮可還此豈不足臨慎勿語他
人此意子獨諳

真興寺閣

秦川不為廣南山不為高差我真興閣傑立陵風飈危
檻俯翔鳥跳簷落飛猱上有傲世人身衣白鶴毛下視
市井喧奔走何噉噉蕭然倚楹嘯遺響入雲霄清風吹

其裾冉冉不可操不知何所為豈即非盧敖遊目萬里
間遠山如伏羔遺語謝世俗釣魚當釣鰲

李氏園

李茂正園也俗謂皇后園蓋茂正謂其妻也

有客騎白駒揚鞭入青草悠悠無遠近但擇林亭好蕭
條北城下園號李家媪繫馬古車門隨意無洒掃鳴禽
驚上屋飛蝶紛入抱竹林淨如濯流水清可澡閒花不
着行香梨獨依島松枝貫今昔林影變昏早草木皆蒼
顏亭宇已新造臨風置酒樽庭下取栗棗今人強歡笑

古人已枯槁欲求百年事不見白鬚老秦中古云樂文

武在豐鎬置囿通樵蘇養獸讓麀麋池魚躍金碧白鳥
飛紵縞牛羊感仁恕行葦亦自保當年歌靈臺後世詠
魚藻古詩宛猶在遺處不可考悲哉李氏末王霸出奴
阜城中開芳園城外羅戰堡擊鼓鳴巨鐘百姓皆懊惱
及夫聖人出戰國卷秋潦園田賦貧民耕破園前道高
原種菽粟陂澤滿粳稻春耕雜壺漿秋賦輸秸藁當年
王家孫自庇無尺椽空餘百歲木妄為天巫禱遊人足

譏罵百世遭舌討老翁不願見垂涕祝襁褓持用戒滿
盈飲酒無醉倒

秦穆公墓

在橐泉上

泉上秦伯墳下埋三良士三良百夫特豈為無益宛當
年不幸見迫脇詩人尚記臨穴惴豈如田橫海中客中
原皆漢無報所秦國吞西周康公穆公子盡力事康公
穆公不為負豈必殺身從之遊夫子乃以侯嬴所為疑
三子王澤既未竭君子不為詭三良徇秦穆要自不得

已

聞子瞻將如終南太平宮谿堂讀書

為吏豈厭事厭事日墮媮著書雖不急實與百世謀問
吏所事何過客及繫囚客實虛攪人囚有不自由辦之
何益增不辦亦足憂嗟此誰不能脫去使自收幽幽南
山麓下有溪水流溪上亦有堂其水可濯漱終日不見
人惟有山鹿呦是時夏之初溪冷如孟秋山榭黃笠展
林筍紫角抽朝取筍為羹暮以榭為羞溪魚鯉與魴山

鳥鶯與鳩食之飽且平偃仰自佚休試探篋中書把卷
揖前修恍如反故鄉親朋自相求蔚如甕中糟久熟待
一筭為文若江河豈復有刻鏤尚何憶我為欲與我同
遊我雖不能徃寄詩以解愁

次韻子瞻麻田青峰寺下院翠麓亭

走馬紅塵合開懷野寺存南山抱村轉渭水帶沙渾亭
峻朱欄繞堂虛白佛尊煩襟喜脩竹勸馬樂芳蓀白氎
柔隨手清泉滿照盆塵顏洗濯淨髀肉再三捫饋食青

蔬軟流匙細粟翻老僧勿施敬對客說山門

次韻子瞻宿南山蟠龍寺

谷中夜行不見月上下不辨山與谷前呼後應行相從
山頭誰家有遺燭楚楚深徑馬蹄響落落稀星著疎木
行投野寺僧已眠叩門無人徇出縮號呼從者久嗔罵
老僧下牀揉兩目問知官吏冒夜來掃牀延客卧華屋
釜中無羹甑實盡愧客滿盎惟脫粟客來已遠睡忘覺
僧起開堂勸晨粥自嗟奔走閔僧間偶然來過何年復

留詩滿壁待重遊但恐塵埃難再讀

賦園中所有十首

時在京師

萱草朝始開呀然黃鵠背仰吸日出光口中爛如綺
纖纖吐須鬣冉冉隨風哆朝陽未上軒粲粲幽閑女美女
生山谷不解歌與舞君看野草花可以解憂悴

其二

寒地竹不生雖生常若病斲根種幽砌開葉何已猛
嬋娟冰雪姿散亂風日影繁華見孤淡一箇敵千頃令人

憶江上森聳緣崖勁無風籜自飄策策鳴荒迳

其三

蘆生井欄上蕭騷大如竹移來種堂下何爾短局促莖
青甲未解枯葉已可束蘆根愛溪水餘潤長鮮綠強移
性不遂灌水惱僮僕晡日下西山汲者汗盈掬

其四

堂後病石榴及時亦開花身病花不齊火候漸已差芳
心竟未已新萼綴枯槎誰言石榴病乃久占年華鄰家

花最盛早發豈容遮殘紅已零落婀娜子如瓜

其五

蒲桃不禁冬屈盤似無氣春來乘盛陽覆架青綾被龍
髯亂無數馬乳垂至地初如早梅酸晚作醲酪味誰能
釀為酒為爾架前醉滿斗不與人涼州幾時致

其六

室幽來客稀塵土積不掃鄰翁笑我拙教我種藂草經
霜斫為簞不讓秋竹好始生如一毛張王忽侵道鉏耰

禁芟斲愛惜待枯槁有用皆勿輕吾師灌園老

其七

吾兄客關中果羸施吾宇兄雖未得還我豈如婦女叻
叻感微物涕泗若零雨但愛果羸莖屈曲上墻堵朝見
緣墻頭暮已過墻去物生隨年華還日何足數

其八

牽牛非佳花走蔓入荒榛開花荒榛上不見細蔓身誰
剪薄素紗浸之青藍盆水淺浸不盡下餘一寸銀嗟爾

脆弱草豈能凌霜晨物性有稟受安問秋與春

其九

南園地性惡雙栢不得長蓬麻春始生今已滿一丈栢
生嗟幾年失意自悽愴有子壓枝低已老非少壯尤栢
栢已冤尤地亦恐妄兩既無所尤高枝幾時放

其十

葵花開已闌結子壓枝重長條困風雨倒臥枕丘壟憶
初始放花岌岌旌節得時能幾時狼籍成荒冗浮根

不任雪採剥收遺種未忍焚枯莖積疊墻角擁

和子瞻記夢二首

兄從南山來夢我南山下探懷出詩卷卷卷盈君把詩
詞古人似弟則吾弟也相與千里隔安得千里馬攜手
上南山不知今乃夜晨雞隔墻唱欹枕窓月亞百語記
一詞秋菊悲蛩吒此語鮑謝流平日我不暇我本無此
詩嗟此誰所借

蟋蟀感秋氣夜吟抱菊根霜降菊叢折寸根安可存耿

耿荒苗下唧唧空自論不敢學蝴蝶菊盡兩翅翻蟲凍
不絕口菊苑不絕芬志士豈棄友列女無兩婚

次韻子瞻題岐山周公廟

周人尚記有周公禾黍離離下有宮破豆烝豚非以報

野巫長跪若為通山園棟宇泉流近

廟後有德潤泉世亂則竭

鳳去

梧桐落葉濛有客賦詩題屋壁二南猶自有遺風

次韻子瞻題扶風道中天花寺小亭

客車來不息轍迹自成溝莫怪慵登寺猶宜賞舉頭獨

遊知憶弟遠望勝登樓處處題詩徧篇篇誰為收

次韻子瞻南溪避世堂

柱杖行窮徑圍堂尚有林飛禽不驚處萬竹正當心虎
嘯風吹籟霜多蟬病瘖獸驕從不避人到記由今未暇
終身住聊為半日吟青松可絕食黃葉不須衾偶到初
迷路將還始覺深堂中有幽士挿髻尚餘簪

和子瞻三遊南山九首

樓觀

次韻

神仙避世守關門一世沉埋百世尊
舊宅居人無姓尹
深山道士即為孫
天寒遊客常逢雪
日暮歸鴉自識村
君欲留身記幽寂
直將山外比羗渾

五郡次韻

蜀人不信秦川好
食蔗從梢未及甘
當道沙塵類河北
依山水竹似江南
觀形隨阜飲溪鹿
雲氣侵山食葉蠶
猶有道人迎客笑
白鬚黃袖豈非聃

傳經臺

卷二
輪扁不能令子巧老聃雖智若為傳遺經尚在臺如故
弟子今無似喜賢

大秦寺

大秦遙可說高處見秦川草木埋深谷牛羊散晚田山
平堪種麥僧魯不求禪北望長安市高城遠似烟

仙遊潭五首

潭深不可涉潭小不通船路斷遊人止龍藏白沫旋剪
藤量水短挿石置橋堅橋外居民少躬耕不用錢

右潭

澄潭下無底將渡又安能慣上橫空水輕生此寺僧曉
魚聞考考石塔見層層不到殊非惡他年記未曾

右南寺

君看潭北寺何用減潭南不到還能止重來獨未厭荒
涼增客思貧病覺僧慙飲水寒難忍誰言柏子甘

右北寺

扶風貴公子早歲伴山家吹笛墮秋葉讀書隨曉鴉業

成心自叛學苦我長嗟石室非人住窮山雪似沙

右馬融石室

洞門蒼蘚合偈仄不容身傳有虛明處中藏窈窕人吹
笙橋上月拾翠洞南春往往來山下蕭然雨洒塵

右玉女洞

和予瞻調水符

子瞻令人取玉女洞水恐其見欺
破竹為契使寺僧藏其一以為往

來之信
故云

多防出多欲欲少防自簡君看山中人老死竟誰謾渴

飲吾井泉饑食甌中飮何用費卒徒取水負瓢罐置符
未免欺反覆慮多變授君無憂符階下泉可嚙

次韻子瞻招隱亭

隱居吾未暇何暇勸夫人試飲此亭酒自慙纓上塵林
深開翠帟岸斷峻嚴闔送雪村酤釀迎陽鳥哢新竹風
吹斷籟湖月轉車輪霜葉飛投坐山梅重壓巾欲居常
有待已失歎無因古語君看取聲名本實賓

次韻子瞻凌虛臺

棄我謂我遠求我謂我還我一爾則二視此臺上山山
高上千天獨不照我顏無乃我自蔽誰謂山則慳遠望
不見趾近視不得鬟山實未始變任子自擇刪北風吹
南崖山上秋葉斑道遠又寒苦皴裂辭難攀晴空卷朝
雲照夜霜月彎強爾登此臺免爾超闌闌

扶風太守宅
舊不見南山

唯此臺上
見之故云

次韻子瞻竹飈

野食不穿囷谿飲不盜盎嗟飈獨何罪膏血自為罔陰

陽造百物偏此愚不與肥癡與瘦點稟受不相髣王孫
處深谷小若兒在襁超騰避彈射將中還復枉一朝受
羈縲冠帶相賔饗愚死智亦擒臨食抵吾掌

次韻子瞻漢陂魚

漢陂霜落魚可掩枯芡破盤蒲折劒巨斧敲冰已暗知
長叉刺浪那容閃鯨鯢蛟子誰復惜朱鬣金鱗漫如染
邂逅相遭已失津偶然一掉猶思塹嗟君遊宦久羊炙
有似遠行安野店得魚未熟口流涎豈有哀矜自欺僭

人生飽足百事已美味那令一朝欠少年勿笑貪七筋
老病行看費鍼砭羊生懸骨空自饑伯夷食菜有不贍
清名驚世不益身何異飲醯徒醕醢

和子瞻讀道藏

道書世多有吾讀老與莊老莊已云多何況其駢傍所讀
嗟甚少所得半已強有言至無言既得旋自忘譬如飲
醇酒已醉安用漿昔者惠子死莊子哭自傷微言不復
知言之使誰聽哭已輒復笑不如飲此藏脂牛雜肥羜

烹熟有不嘗安得西飛鴻送弟以與兄

次韻子瞻南溪微雪

南溪夜雪曉來霽有客晨遊酒未消風泛餘花來逐馬
光浮斷澗不知橋山寒凍合行人息醉熟賓歡舞意囂
歸騎相將踏瑤玉嗅林閑認早梅條

和子瞻司竹監燒葦園因獵園下

駿馬七尺行馮馮曉出射獸霜為冰荻園斫盡有枯枿
束茅吹火初如燈乍分乍合勢開展蒼烟被野風騰騰

黃狐驚顧嘯儔侶飛鳥先起如蒼蠅須臾立旆布行伍
有似脩蟒橫岡陵蒼鷹猛獸出前後缺處已挂黃麻罽
回風忽作火力怒平地一卷無疆塍商辛不出抱寶苑
曹瞞逸去焦其肱投身誤喜脫灰燼闔首旋已遭侵凌
何人上馬氣吞虎狐帽壓耳皮蒙膺開弓徐射疊雙兔
擁馬驪叫驚未曾舉鞭一麾百夫進擊鼓再發箭舉棚
去如飛壘中如電獲若雨獸膏流渾肉分麾下飽壯士
皮與公子留縑繒縱橫分裂惠村塢尚有磊落載後乘

吾兄善射久無敵是日斂手稱不能憑鞍縱馬聊自適
酒後醉語誰能應健兒擊搏信可樂主將雄猛今誰勝
胸中森列萬貔虎嗟世但以文儒稱安得強弓傳長箭
使射蔽日垂天鵬

木山引水二首

引水穿牆接竹梢谷藏峰底大容瓢將流旋滴廬山瀑
已盡還來海上潮亂點落池驚睡覺半山含潤沃心焦
瓦盆一斛何勝滿溢去猶能浸菊苗

簷下枯槎拂荻梢山川迤邐費公瓢
幽泉細細流巖鼻盆水瀾瀾漲海潮
但愛堅如湖上石誰憐收自竈中焦
蒼崖寒溜須佳蔭尚少冬青石璽苗

興州新開古東池

山遶興州萬疊青池開近郭百泉并
昔年種柳人安在累歲開花藕自生
波暖跳魚聞樂喜人來野鴨望船鳴
西還過此須終日為問使君行未行

子瞻喜雨亭北隋仁壽宮中怪石

仁壽宮中穠穀生太湖蒼石草間橫興衰換世身猶在
南北從人事已輕累石作臺秋蘚上鑿汧通水細渠清
三年此亦非公有空使他年記姓名

用林妣韻賦雪

密雪來何晚窮冬候欲差投空落細米布地淨平沙繚
繞飛相著重仍積暗加雨微花破碎風細脚傾斜次第
來如摻冥濛墮不譁煇鵝吹勁韉秀葦拂輕韞畫宇飄
還沒團毬暖旋窅出鹽東海若鍊石古皇媧翻簸騰歸

騎紛飄集晚鴉庭梅辨紅萼
壠麥覆黃芽撥砌求新藥
尋蹤射伏麋埋樓平盡脊
集樹短留槎亂下曾何擇
平鋪欲盡遮欺貧寒入褐
惱客重添車積素聊成燭
烹甘強試茶病僧添曉鉢
老令放晨衙融液曾何有
鮮明竟不奢積多還避井
化早發從畚溜滴簷垂箸
行觀逕轉虵誰能相就醉
都市酒容賒

送張唐英監閬州稅

閬中雖近蜀監稅本閒官
豈足淹賢俊聊應長羽翰
讀

書心健否答策意何闌未可厭畋獵田中有走貆

送張師道楊壽祺二同年

故國多賢俊登科並弟兄重來舊遊處兩見近題名
冉冉須堪把駸駸歲可驚孤轅已南向足馬復西征
入峽猿應苦還荆鴈已鳴喜從元帥幕官職漸崢嶸

送家定國同年赴永康掾

清慎岷山掾登科已七年迎親就魚稻為吏擇林泉
去騎關中熱歸心沫水鮮官閒幸可樂記買鷓鴣煎
永康多鷓鴣

鵠

送霸州司里翟曼

大梁能賦客邊郡繫囚曹官職不相稱聲名終自高
試觀為吏苦應過讀書勞努力事初宦尺絲無厭縲

送道士楊見素南遊

黃河春漲入隋溝
任意隨波日夜流
萬里尋山如野鶴
一身浮水似輕鷗
湖風送客那論驛
嶽寺留人暗度秋
遲子北歸來見我
攜琴委曲記深幽

利路提刑亡伯郎中挽詞二首

好學先鄉黨登科復妙年誰為耆舊傳最處縉紳先淪
謝今亡矣風流孰繼焉魂歸食里社世世仰仁賢

其二

晚歲官仍困終身耻自言廉明漢循吏仁愛鄭公孫赤
縣朝稱理衡山德共尊遠人應罷市處處有遺恩

伯母同安縣君楊氏挽詞

德盛諸楊族賢宜伯父家周姜職蘋藻歆母事桑麻大

邑移封近陰堂去日賒空餘鏡奩在時出舊筭珈

樂城集卷二


謹案卷一第二頁前七行俄頃已不見刊本俄訛
我據別本改

第十七頁後三行魏將猶存仲達情刊本情訛精
據宋元詩會改

卷二第九頁後五行擊鼓鳴巨鐘刊本擊訛繫據
別本改

欽定四庫全書





總校官庶吉士臣張能照

校對官檢討臣龔大萬

膳錄監生臣賈捷三

欽定四庫全書薈要

集部

藥城集卷三

四



詳校官助教臣常循

欽定四庫全書薈要卷一萬四千九百九十八

集部

樂城集卷三

宋 蘇轍 撰

詩七十五首

北京送孫曼叔屯田權三司開圻司

人生不願才才士困奔走君為大農屬求暇更能否自

我游魏博相識恨未久誰言但傾蓋信有勝白首清晨坐
風觀落日語涼牖慕精動如律弓健不論斗旁觀我不
能晤語君見受秋風起沙漠淒雨濕征袖送行欲汲汲

富貴恐君後將去聊遲遲已遠悲朋友

和強至太博小飲

誰能飲酒如傾水醉倒坐中扶不起形骸外物已如遺
升斗任君無復避霜黎冰脆寒侵齒未盡一杯先已醉
強將文字笑紅裙冷淡為歡何足貴

和強君瓦亭

君為魏博三年客日有江湖萬里心暫得野亭留馬足
強循疎柳步堤陰無人攜手共吳語得意搖頭時越吟

何日東郊過微雨竝騎鞍馬去同尋

中秋夜八絕

得月明星稀
烏鵲南飛

長空開積雨清夜流明月看盡上樓人油然就西沒
誰遣常時月偏從此夜明暗添珠百倍潛感兔多生
欲見初容燭將升尚有星漸高圍漸小雲外轉亭亭
明入庭陰白寒侵酒氣微夜深看更好樓上漸人稀
浮光看不定重露試還無影翻狂舞客明誤已棲烏
巧轉上人衣徐行度樓角河漢冷無雲冥冥獨飛鵲

猿狖號枯木魚龍泣夜潭行人已天北思婦隔江南
看久須扶立行貧遂失歸誰能終不睡爛醉羽觴飛

次韻王君貺尚書會六同年

有美佳賓賢主人布衣曾共脫京塵歡來未覺歲華晚
醉後能令秋氣春發譽早同初宦日收功終藉老成身
他年此會應圖畫傳入誰家屏障新

王公生日

純陰十月晚勁氣肅羣驕惟有喬松在長看積雪消生

賢稟真性特立冠當朝
早歲初成賦羣雄已失標
治才精破竹廷論壯生飈
博士皆推賈宣皇重試蕭
周旋窮政體出入解心焦
九列高稱冠三台豈足超
論功歸穎霸舉相待虞姚
驥騁經新卧弓強發久沼
百年時節在四海衆心翹
當見飛中使齋金賜此朝

二府生日
例賜金帛

次韻姚孝孫判官見還岐梁唱和詩集

伯氏文章豈敢知
岐梁偶有往還詩
自憐兄力能兼弟
誰肯墳終不聽麓
西號春游池百頃
南溪秋入竹千枝

恨君曾是關中吏屬和追陪失此時

次韻王臨太博馬上

冬晚霜露重城遙鞍馬勞徒知事奔走曾未補毫毛
水旱嗟嚙蹙瘡痍費抑搔莫歸何暇食堆案簿書高

次韻王君北都偶成三首

河轉金隄近天高魏闕新千夫奉儒將百獸伏麒麟
校獵沙場莫談兵玉帳春關南知不遠誰試問蕃隣

其二

天寶亂已定河壩兵更多故城埋白骨遺俗喜長戈卧
獸常思肉奔鯨不受羅縱橫竟安在唯見冢嵯峨

一
其三

禁籞封金殿清河貫石門時平餘古木兵散有空屯形
勝山園濶蕃宣海內尊川原不論頃雲夢可勝吞

次韻沈立少卿白鹿

白鹿何年養驚猜未肯馴軒除非本性飲食強依人照
影冰浮水飛毛雪灑塵獨游應已倦忽見乍疑神野色

明幽步煙蕪薦卧身異姿人共愛清意爾誰親日暖山
苗熟風微澗草春何緣解韉繫奔放任天真

送陳安期都官出城馬上

城中二月不知春唯有東風滿面塵歸意已隨行客去
流年驚見柳條新簿書填委休何日學問榛蕪愧古人
一頃稻田三畝竹故園何負不收身

登上水關

淇水沄沄入禁城城樓中斷過深清空郊南數牛羊下落

日迴瞻觀闕明歲月逼人行老大江湖發興感平生畫舫早晚籠新屋慰意來看水平

寒食贈遊壓沙諸君

城南壓沙古河淤沙上種梨千萬株隆冬十月我獨往
風吹葉盡枝條疎老僧屈指數春候却後百日花當蘇
微風細雨膏潤足枝頭萬萬排明珠齊開競發不知數
照耀冰雪明村墟此時官閒得遊賞長堤平穩宜驂駒
寺門古木芽葉動倉庾布穀相和呼及時行樂不可緩

歲長春短花須臾僧言我意兩相值欲往屢已脂吾車
今朝寒食煙火斷薄雲蔽日風沙除此花久已待我至
況有朋友相攜扶來邀反覆不能往豈獨負君花已辜
諸君高邁足才思佐酒況得萬玉奴坐中未醉慎無起
倒戴當使山公如

明日安厚卿強幾聖復召飲醉次前韻

芳樽酌水清無淤梨園著雪迷根株鄴官士女喜行樂
坐上醉客誰親疎倦遊不知歲月過痛飲漸覺筋骸蘇

風吹落片亂鴉毳雨結細實駢明珠雲屯冰積動論頃
誰信城郭涵村墟坐觀明媚低照席行看繁鬧橫遮駒
我貧不辦供酒炙側耳日聽交朋呼無端人事巧拘束
曾不見置閒須臾長鯨渴水求入海老驥伏櫪思就車
清明未過春未老寒食豈必節與除二君為我重置酒
席上醉倒交相扶歡娛安用苦酬酢呷嘯不畏相罪辜
昏然已覺萬物小下視吏役真婢奴請君數具牛酒費
此外百事何能如

次韻柳子玉郎中見寄

新年始是識君初，顧我塵埃正滿裾。
談辯未容朝夕聽，情親空愧往還書。
久聞筆陣無前敵，更擬詩壇託後車。
待得入城應少暇，相從有約定何如？

秀州僧本瑩淨照堂

有僧訪我攜詩卷，自說初成淨照堂。
求得篇章書壁素，不論塵土漬衣黃。
故山別後成新歲，歸夢春來遶舊房。
看取盈編定何益，客來無語但循牆。

京師送王頤殿丞

憶遊長安城皆飲母卿宅身雖坐上賓心是道路客笑
言安能久車馬就奔迫城南南山近勝絕聞自昔徘徊
竟莫往指點煩鞭策道傍古龍池深透河渭澤山行吾
不能愧此纔咫尺壯哉誰開鑿千頃如一席參差山麓
近滉蕩波光射君時在池上俗事厭紛劇望門不敢叩
恐笑塵土迹自從旅京師所向愈無適君來曾未幾已
復向南國扁舟出淮汴唯見江海碧野人處城市長願

有羽翮脫身相從遊未果聊自責

石蒼舒醉墨堂

石君得書法弄筆歲月久經營妙在心舒卷功隨手惟
茲逸羣氣扶駕須斗酒作堂名醉墨揮灑動牆牖安得
濁酒池淋漓看濡首但取繼張君莫顧顛名醜

遊淨因院寄璉禪師

歲月潛消日裏冰依然來見佛堂燈此身已自非前我
問法何妨似舊僧灑面飛泉時點點壓池蒼石尚層層

遙知近愛金山好江水煎茶日幾升

送柳子玉

柳侯白首郎風格終近古舊遊日零落新輩誰與伍人
情逐時好變化無定主試看近時人相教蹈規矩行身
劇孔孟稱道皆舜禹但求免譏評豈顧愁肺腑坐令不
羈士舉足遭網罟緬懷我生初遺俗尚目睹中庸雖已
亡比近則猶愈老成慎趨好後生守淳魯豈效相謾欺
街牛沽馬脯過惡酒色間可罪非可惡譬如嵇與阮心

迹豈深蠹京師逢柳侯往事能歷數歎息子美賢相與
實舊故至今存篇章醉墨龍蛇舞斯人今苟在亦恐終
因虜惜哉時論隘安置失處所一麾寄河壖垂老幸有
土世俗安足論且盡杯中醕

送蘇公佐修撰知梓州

乘軺舊西蜀出鎮復東川父老知遺愛壺漿定滿前江
山昔年路旄節異邦權望重朝中舊疆分劒外天歲登
無猛政蠻服罷防邊去國身雖樂憂時論獨堅孤誠抱

松直彙進比茅連我亦相從逝疎狂且自全

送任師中通判黃州

一別都門今五年劇談精壯故依然厭居巴蜀千山底
決住荆河十頃田老去功名無意取身閒詩筆更能專
黃州無事聊須飲世俗方今自足賢

南窓

京師三月雪雪盡泥方深閉門謝還往不聞車馬音西
齋書帙亂南窓初日升旗轉守床榻欲起復不能開戶

失瓊玉滿階松竹陰客從遠方來疑我何苦心踈拙自
當爾有酒聊共斟

次韻楊褒直講攬鏡

鬢髮年來日向衰相寬不用強裁詩壯心付與東流去
霜蟹何妨左手持花發黃鸝巧言語池開楊柳闌腰肢
勸君行樂還聽否即是南風苦熱時

送錢婺州純老

桃花汴水半河流已作南行第一舟倦報朝中言嘖亂

喜聞淮上檣咿呦平時答策詞無枉此去爲邦學更優
自古東陽足賢守請君重賦沈公樓

次韻柳子玉見贈

壯心衰盡愧當年刻意爲文日幾千老去讀書聊度歲
春來多睡苦便羶夢歸似鴈長飛去才短如蠶只自纏
唯有聞詩尚思和可能時寄最高篇

次韻任遵聖見寄

故國老成誰復先壯心空記語當年灌夫失意貧無友梅

福辭官晚作仙詩句清新非世俗
退居安穩卜江天他
年我亦從君隱多買黃魚煮復煎

次韻劉貢甫學士畫松石圖歌

長松大石生長見
竭遊塵土嗟空羨
寒翠關心失舊交
榮華過眼驚流電
破繒買得古畫圖
遺墨參差隨斷線
蟠枝倒掛風自舞
直幹孤生看面面
故山舊物遠莫致
愛此隨人共流轉
物生真偽竟何有
適意一時寧復辨
少年所好老成癖
傍人指笑嗟矜衒
京城宅舍松石希

買費百金猶恐賤

送頌起及第還蔡州

詔書京輔起沉淪歲貢仍居第一人不愧得官名暫屈
自誇對策語深淳讀書飽足終無厭從宦奔馳自此新
我去淮陽今不久鄰邦時得問音塵

初到陳州二首

謀拙身無向歸田久未成來陳為懶計傳道愧虛名俎
豆終難合詩書強欲明斯文吾已試深恐誤諸生

其二

久愛閒居樂茲行恐遂不上官容碌碌飽食更悠悠枕
畔書成癖湖邊柳散愁踈慵愧韓子文字化潮州

柳湖感物

柳湖萬柳作雲屯種時亂插不須根根如卧虵身合抱
仰視不見蜩蟬喧開花三月亂飛雪過墻度水無復還
窮高極遠風力盡棄墜泥土顏色昏偶然直墮湖中水
化為浮萍輕且繁隨波上下去無定物性不改天使然

南山老松長百尺根入石底蛟龍蟠秋深葉上露如雨
傾流入土明珠圓乘春發生葉短短根大如指長而堅
神農嘗藥最上品氣力直壓鍾乳溫物生稟受久已異
世俗何始分愚賢嘗見野人言柳花入水為浮萍松上
露墮地為仙茅陰乾服之益人古方
云十斤鍾乳不
如一斤仙茅

柳湖久無水悵然成詠

平湖水盡起黃埃惟有長堤萬萬栽病鶴摧頽沙上舞
遊人寂寞岸邊回秋風草木初搖落日暮樵蘇自往來

更試明年春絮起共看飛雪亂成堆

次韻孫戶曹朴柳湖

疎慵非敢獨違時野性顛狂不受羈猶有曲湖容笑傲
誰言與物苦參差水乾生草曾非惡鶴舞因風忽自怡
最愛柳陰遲日暖幅巾輕屨肯相隨

贈李簡夫司封

平生談笑接諸公歸老身心著苦空往事少能陪晤語
新詩時喜挹清風形骸摩詰羸偏健筆札西臺晚更工

笑我壯年常苦病異時何以作衰翁

次韻李簡夫秋園

秋色豈相負小園仍有花遶欄吟落日拾徑得殘葩菊
細初藏蝶桐疎不庇鴉遊觀須作意霜雪僅留槎

題李簡夫葆光亭

遙草侵芒屨庭花墮石臺小亭幽事足野色向人來坐
上烏皮几牆間大瓠壘老成無不可談笑得徘徊

次韻李簡夫因病不出

十五年來一味閒近來推病更安眠鶴形自瘦非關老
僧定端居不計年坐上要須長滿客杖頭何用出攜錢
未嫌語笑妨清靜閒暇陪公几杖前

張安道尚書生日

出入三朝望愈尊淮陽退卧避喧煩崇高歷徧知皆妄
風俗頻遷氣獨存世事直須勞舊德歸心那復厭名藩
赤松作伴功雖切白髮憂時義所敦仁比高山年自倍
秋逢生日喜盈門知公知命身無禱聊為生靈舉壽樽

送劉道原學士歸南康

大川傾流萬物俱根旋脚脫爭奔徂流萍斷梗誰復數
長林巨石曾須臾軒昂顛倒唯恐後嗟子何獨強根株
三年一語未嘗屈擬學文舉驚當塗志知勢力非汝敵
獨恐清議無遺餘扁舟歲晚告歸覲家膳欲及羞蓴鱸
隱居高節世所尚掛冠早歲還州閭紛紜世事不著耳
得失豈復分錙銖投身固已陷泥滓獨立未免遭霜濡
君歸左右識高趣牛毛細數分賢愚

題滑州畫舫齋贈李公擇學士

窓戶重重向日明
船居氣味此中生
汀洲出沒叢花短
波浪澄虛兩岸平
竄逐南來身未穩
安閑感物意猶驚
前賢事迹君今似
不愧當年畫舫名

歐陽公南還佐是邦而為此齋公擇

之謫亦從南來故云

送王恪郎中知襄州

魏公德業冠當年
汝守威名竦漢邊
將相傳家俱未遠
子孫到處各推賢
風流最喜君真似
符竹連分政得專

峴首重尋碑，墮淚習池還。
拍客橫鞭逃，亡已覺依劉表。
寒俊應須禮浩然，當有郡人知古意。
欄街齊唱接籬篇。

和張安道讀杜集

用其韻

我公才不世，晚歲道尤高。
與物都無著，看書未覺勞。
微言精老易，奇韻喜莊騷。
杜叟詩篇在，唐人氣力豪。
近時無沈宋，前輩蔑劉曹。
天驥精神穩，層臺結構牢。
龍騰非有迹，鯨轉自生濤。
浩蕩來何極，雍容去若遨。
壇高真命將，毳亂始知髦。
白也空無敵，微之豈少褒。
論文開錦繡。

賦命委蓬蒿初試中書日旋聞廊時逃妻孥隔豺虎闕
輔暗旌旄入蜀營三徑浮江寄一艘投人慚下舍愛酒
類東臯漂泊終浮梗迂疎獨釣鰲誤身空有賦揜脛惜
無袍卷軸今何益零丁昔未遭相如元竝世惠子謾臨
濠得失將誰怨憑公付濁醪

送張公安道南都留臺

識公歲已深從公非一日仰公如重雲庇我貧賤迹公
歸無留意我處念平昔少年喜文字東行始觀國成都

多遊士投謁密如櫛紛然衆人中顧我好顏色猖狂感
一遇邂逅登仕籍爾來十六年鬢髮就衰白謀身日已
謬處世復何益從來學俎豆漸老信典冊自知百不堪
偶未三見黜譬如溝中斷誰復強收拾高懷絕塵土舊
好等金石庠齋幸無事樽俎奉清適居然遠憂患況復
取矜式汪洋際海深淡泊朱弦直徇時非所安歸去亦
何失道存尚可卷功成古難必還尋赤松子獨就丹砂
術恨無二頃田伴公老蓬華

傅欽之學士濟源草堂

聞有高居直百金，西山南麓北山陰。
園通濟水池塘好，花近洛川顏色深。
人去節旄分重鎮，客來猿鶴感幽吟。
湙溪雨過西湖漲，歸興蕭然定不任。

欽之時
在許州

文與可學士墨君堂

虛堂竹叢間，那復厭竹遠。
風庭響交戛，月牖散凌亂。
尚恐晝掩關，嬋娟不長見。
中堂開素壁，蕭颯起霜幹。
隨宜賦生意，落筆皆葱蒨。
根莖雜土石，枝葉互長短。
依依露

下綠冉冉風中展開門視叢薄與此終何辨

故成都尹陸介夫挽詞

擁節西南未一年淒涼道路泣東轅蜀都富樂真當惜
民事艱難誰復論白馬何人趨遠日青芻盈束更無言
異時歸去逢遺老空聽咨嗟述舊恩

次韻柳子玉謫官壽春舟過宛丘見寄二首

局冷曾非簿領迷幽居渾似未官時忽聞客至驚還喜
出見泥深笑不知謀拙未能憂歲計身閒聊可飽晨炊

行舟借問何忽草淮口無潮月正虧

獻酬不用辭升斗曲直何勞問尺尋要路風波無限惡
謫居情味最能深交從錦水初無間鄰卜共山已有心
草聖詩豪並神速數因南鴈惠佳音

次韻子瞻潁州留別二首

託身遊宦鄉終老羨箕潁隱居亦何樂親愛形隨影念
兄適吳越霜降水初冷翩然事舟楫棄此室廬靜平明
知當發中夜抱虛警永懷江上宅歸計失不猛人生徇

所役有若魚墮井遠行豈易還剝飲終難醒不如早自
乞閑日庶猶永世事非所憂多憂亦誰省

其二

放舟清淮上蕩潏洗心胸所遇日轉勝恨我不得同江
淮忽中斷陂埭何重重紫蟹三寸筐白鳧五尺童赤鯉
寒在汕紅粳滿霜風西成百物賤加食慰貧窮胡為復
相念未肯安南東人生免饑寒不受外物攻不見田野
人四壁編茅蓬有食輒自樂誰知富家翁

陪歐陽少師永叔燕潁州西湖

西湖草木公所種仁人實使甘棠重歸來築室傍湖東
勝遊還與邦人共公年未老髮先衰對酒清歡似昔時
功成業就了無事令名付與他人知平生著書今絕筆
閉門燕居未嘗出忽來湖上尋舊遊坐令湖水生顏色
酒行樂作遊人多爭觀竊語誰能呵十年思潁今在潁
不飲耐此遊人何

歐陽公所蓄石屏

石中枯木雙扶疎粲然脉理通肌膚剖開左右兩相屬
細看不見毫髮殊老樗剝落但存骨病松憔悴空留鬚
丘陵迤邐山麓近雲烟澹霽風雨餘我驚造物巧如此
刻畫瑣細供人須公家此類尚非一客至不識空嗟吁
案頭紫雲抱明月床上寒木翻飢烏賦形簡易神自足
鄙棄筆墨嗟勤劬天工此意與人競雜出變恠驚羣愚
世間淺拙無與敵比擬賴有公新書

月石硯屏及石上
寒林棲鳥皆公詩

賦所

次韻子瞻初出潁口見淮山

清淮此日見滄浪始覺南來道路長
牕轉山光時隱見船知水力故軒昂
白魚受釣收寒玉紅稻堆場列遠岡
波浪連天東近海乘桴直恐漸茫茫

次韻子瞻壽州城東龍潭

東行取次閱三州擊鼓清晨復解舟
車騎紛紜追過客歌鐘淒咽動潛虬
宦遊底處非巢燕歸計何嫌謁沐猴
賴有故人憐遠適慇懃屢勸酒行周

和子瞻渦口遇風

長淮暮生風來自渦河口
新舟雖云固波浪亦難受
詩來話艱厄驚恐及兒婦
憶同泝荆峽終夜愁石首
餘飈入幃幄跳沫濺窓牖
平生未省見驚顧欲狂走
爾來涉憂患漸覺成老醜
遙喜波浪中時能飲醇酒

和子瞻濠州七絕

塗山

娶婦山中不肯留
會朝山下萬諸侯
古人辛苦今誰信

只見清淮入海流

彭祖廟

長說先師似老彭
共疑好學古書生
不知亦解食雲母

白日登天萬事輕

山有雲母云
彭祖所採服

逍遙堂

莊周墓上
祠堂也

猖狂戰國古神仙
曳尾泥塗老更安
厭世乘雲人不見
空墳聊復葬衣冠

觀魚臺

莊子談空惠子聽郢人斤斧埃忘形莫嗟質喪無知者
對石何妨自說經

虞姬墓

布叛增亡國已空摧殘羽翮自令窮艱難獨與虞姬共
誰使西來敵沛公

四望亭

大和中郡守劉嗣之立
李紳為之記今亭廢矣

唐史不聞劉嗣之空傳短李舊歌詩高亭毀盡唯存記
猶有區區父老知

浮山洞

洞在淮上夏潦不能及而冬不加高故人疑其浮也

洞府元依水面開
秋潮每到洞門回
幽人燕坐門前石
長看長淮船去來

和子瞻泗州僧伽塔

清淮濁汴爭強雄
龜山下閼支祁宮
高秋水來無遠近
蕩滅洲渚乘城墉
千艘銜尾誰復惜
萬人雨泣哀將窮
城中古塔高百尺
下有蛻骨黃金容
蛟龍百恠不敢近
迴風倒浪歸無蹤
越商胡賈豈知道
脫身獻寶酬元功

至人已立萬物表劫火僅置毛孔中區區淮汴亦何有
一挹可注滄溟東胡為尚與水族較時出變怪驚愚瞽
於乎此意不可詰仰觀飛拱凌晴空

次韻子瞻發洪澤遇大風却還宿


昨夜宿洪澤再來遂如歸却行雖云拙乘險諒亦非誰
言淮陰近阻此駭浪飛長風徑千里蛟蜃相因依眇然
恃一葉此勢安可違冒涉彼何人勇決生慮微欲速有
不達魚腹豈足肥風帆尚可轉野廟誰能祈但當擁衾

睡慎閉牕與扉夜間聲尚惡起視聊披衣

次韻子瞻記十月十六日所見

君不見天高后土黃變化出入唯陰陽旋凝細霧作飛
電復遣震雷追日光可憐萬物甚微細坐聽百變隨顛
僵深根固蒂無計遯倏來忽返安能防平生未見實驚
耳稍遠不知如隔牆君看歌舞醉華屋下有纍繫排兩
廊眼前苦樂尚懸絕空中造化知有亡我居宛丘厭凝
沍雪翻海水填陂塘但知膏澤利年麥恣食麤餌真嘉

祥山陽所記亦何事有酒胡不盡一觴



總校官庶吉士臣張能照

校對官檢討臣龔大萬

膳錄監生臣賈捷三

膳錄監生臣張子誠